

Communicaziun a las medias – Cussegl dal public SRG.R – 03/2018**RTR ha ina buna preschientscha e purschida sin ils chanals da social media**

Mustér, ils 12-09-2018

En sia seduta champestra en la claustra benedictina a Mustér ha il Cussegl dal public SRG.R analisà la purschida da RTR sin Facebook ed Instagram. En general survegn questa purschida bunas notas. Ils temas sajan actuals e pertutgian differentas spartas da la vita. Er la pagina rtr.ch po prender encunter bler laud dal Cussegl dal public. Ella fetschia ina buna parita e saja clera e survesaivla. Main laud datti per ina acziun che RTR ha fatg avant la festa da chant a Chiavenna.

RTR sin Facebook ed Instagram

Sin ils chanals da social media po il public s'infurmar mintga di davart las actualitads senza perder bler temp cun tschertgar. Quai plascha al Cussegl dal public. En ses rapport menziuna el er la variaziun tranter infurmaziun e divertiment che saja tschernida bain. Tge che crodia dentant si saja ch'ils posts sin Facebook e sin Instagram sajan per il pli identics e quai saja donn. Ils ultims onns haja RTR dà grond pais als chanals da social media e quai saja da valitar fitg positiv. Uschia saja RTR er attractiv per personas pli giuvnas.

rtr.ch – in svilup fitg positiv

La pagina d'internet rtr.ch saja structurada fitg bain. Ella saja uschia adattada per tut ils apparats (pc, tablet, smartphone). Ils temas sajan ordinads tenor criteris survesaivels – sulettamain en la rubrica «ulteriuras novitads» daventia quai main survesaivel. Interessant e nizzaivel sajan er las propostas sut «dapli dal tema». Per tschertgar emissiuns u contribuziuns stoppian ins dar en il chavazzin per rumantsch grischun. Quai fetschia in zic pli cumplitgà il tschertgar, ma na saja tuttina betg in impediment. L'applicaziun «play rtr» haja ina structura clera e survesaivla ed ins chattia fitg svelt las contribuziuns. Al Cussegl dal public plascha surtut la clera structura, la sauna relaziun tranter text e fotografia, la auta qualidad dals films e che la pagina d'internet dettia pais a novitads ed occurrenzas regionalas.

La Canorta – in format cun potenzial

L'idea da laschar vegnir a pled in expert extern vegn beneventà dal Cdp. Cun grond engaschament ha Guido Derungs accompagnà tras l'emissiun ed empruvà d'animar auditoras ed auditurs dal Radio Rumantsch da raquintar d'experienceschas, anecdotes e reminiscenzas fatgas en connex cun festas da chant. Savens è quai strategià bain, autras giadas main, in'experiencescha ch'er las moderaturas ed ils moderaturs professionals da RTR

fan bain savens cura ch'els vuessan entrar en contact cun il public. Plaschì fitg bain al Cdp ha la schelta da la musica, da las chanzuns da chors, ch'è vegnida fatga per las emissions. En mintga cas animescha il Cdp da cuntinuar cun quest format, quai cun resguardar las experientschas fatgas en connex cun la premiera da La Canorta, uschia per exempel da ponderar sch'ins na vuess betg far la moderaziun en dus, pia laschar accompagnar l'expert extern durant l'emissiun dad in moderatur da RTR. In compliment spezial fa il Cdp ad RTR per ulteriuras emissions realisadas avant, durant e suenter la festa da chant chantunala a Chiavenna. Quellas sajan grategiadas fitg bain.

In sguard anavant

Ils proxims temas ch'il Cussegl dal public prenda sut la marella èn la plattafurma online «nossaistorgia.ch», nua che in e scadin po inoltrar fotografias ed istorgias da pli baud, la gasetta «Accents» che cumpara quatter giadas ad onn e l'emissiun naziunala «ils auters» che lascha vegnir a pled correspondents da mintga regiun linguistica en Svizra.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissions ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79